

JUA

ATAKSHA papin aar akupkamu

Nekasa nunasha tura anenaitniuncha ujaawai

¹Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. ²Nekas-chicham tuke amuutsuk ii enentáin pujá asantai aneajrume. ³Yus ii Aparísha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentrak yainmakarti. Nujai nekas-chicham nekaarum anenaittiarme.

⁴Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin ániawai. ⁵Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame. ⁶Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaiknumia antukuitrume.

Anenkartincha írunui

⁷Ju nunkanam anenkartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anenkartin ásar Kristu nemasri ániawai. ⁸Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umíana nu shuar Yus Apajaisha tura ni Uchirijaisha mai tsanin pujawai. ¹⁰Shuar Kristu chichamen jintíachu atumí jeen írmástaj tusa jeakui awayáwairap tura “shiir taume” tiirap.

¹¹Kame nu shuar “shiiir taume” tákumka nu shuar yajauch jintíamu jímiareame.

Umíamu chicham

¹²Ti nukap atunjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjái. Nuyá naka chichasar ti shiir warastatji.

¹³Ame kaim Yus achikma nuna uchirí amikmaatmainiawai.
Nuke atí.